



<https://journal.unisza.edu.my/jimk>

[SYARIAH MAQASID PERSPECTIVE IN PRESERVING FAMILY INSTITUTION]

PERSPEKTIF MAQASID SYARIAH DALAM MEMELIHARA INSTITUSI KELUARGA

WAN NOR ADIBAH WAN AHMAD,¹ ADAWIYAH ISMAIL¹
& AHMAD IRDHA MOKHTAR¹

² Pusat Kajian Dakwah dan Kepimpinan, Fakulti Pengajian Islam, Universiti Kebangsaan
Malaysia, 43600 UKM Bangi, Selangor MALAYSIA. E-mail: ada@ukm.edu.my;
irdha@ukm.edu.my

*Corresponding Author: ada@ukm.edu.my

Received Date: 15 November 2021 • Accepted Date: 1 December 2021

Abstract

Family institutions are the basic structure of the entire social and cultural system of a society. Nowadays, however, a variety of social symptoms occur that show Muslims have neglected the true purpose of establishing a family institution. Therefore, this study was conducted to identify the perspective of the syariah maqasid in preserving family institutions. This study is a qualitative study primary and secondary books. In order to obtain data, researchers analyze by using descriptive content analysis. The study found that the syariah maqasid's perspective in preserving family institutions is to preserve the continuity of the lineage, to preserve the legitimacy of the lineage and to preserve the quality of the offspring's integrity in ensuring the preservation of the syariah maqasid in the family institution in order to preserve the survival of the offspring in accordance with Allah SWT's command.

Keywords: *Career, family institution, syariah maqasid, lineage*

Abstrak

Institusi keluarga merupakan struktur asas bagi keseluruhan sistem sosial dan kebudayaan dalam sesebuah masyarakat. Namun kini, pelbagai gejala sosial berlaku menunjukkan umat Islam gagal merealisasikan matlamat pembentukan institusi keluarga dalam kehidupan. Justeru, kajian ini dilakukan bagi mengenal pasti perspektif maqasid syariah dalam memelihara institusi keluarga. Kajian ini berbentuk kajian kualitatif yang menggunakan buku-buku primer dan sekunder. Bagi mendapatkan data, pengkaji menganalisis dengan menggunakan analisis kandungan secara deskriptif. Dapatan kajian mendapati bahawa perspektif maqasid dalam memelihara institusi keluarga bertujuan memelihara kesinambungan manusia, kestabilan keluarga dan kualiti kesolehan keturunan dalam memastikan pemeliharaan institusi keluarga. Implikasi kajian dapat membantu ibu bapa memahami perspektif maqasid syariah dalam institusi keluarga bagi memelihara kelangsungan keturunan sejajar dengan perintah Allah SWT.

Keywords: *Pelihara, institusi keluarga, maqasid syariah, keturunan, nasab.*

Cite as: Wan Nor Adibah Wan Ahmad, Adawiyah Ismail & Ahmad Irdha Mokhtar. 2021. [Syariah maqasid perspective in preserving family institution] Perspektif maqasid syariah dalam memelihara institusi keluarga. *Jurnal Islam dan Masyarakat Kontemporari* 22(3): 16-28.

PENGENALAN

Manusia berperanan sebagai khalifah untuk memakmurkan muka bumi bagi mencapai objektif penciptaan manusia. Menurut al-Ghazali (1992) bahawa tugas khalifah adalah menegakkan hukum agama dan menguruskan dunia berpandukan agama. Tugas ini tidak mungkin ditegakkan atau dilaksanakan kecuali dalam bentuk berjemaah atau saling tolong menolong dalam masyarakat. Ini kerana tugas khalifah yang ditaklifkan kepada seorang individu tidak hanya sekadar ibadat rohani sahaja tetapi ia menuntut kepada memakmurkan bumi secara teori dan praktikal seperti mana Islam memfardukan ibadat solat dilaksanakan secara individu dan berjemaah.

Menurut Ibn Khaldun (2016), secara tabiatnya manusia diciptakan Allah SWT sebagai makhluk yang perlu hidup secara bermasyarakat. Pembentukan masyarakat yang soleh dapat membantu individu untuk melaksanakan tugas sebagai khalifah. Tugas khalifah ialah menggantikan rasulullah SAW dalam menjalankan perannya sebagai pembawa rahmat ke seluruh alam seperti mana firman Allah SWT dalam surah al-anbiya' (17:107) yang bermaksud "Tidaklah diutuskan aku melainkan membawa rahmat kepada seluruh alam".

Para ulamak menghuraikan makna rahmat kepada dua aspek iaitu untuk mendapatkan kemaslahatan dan mengelakkan kemudaratan. Imam Al-Ghazali (1992), menggariskan kemaslahatan ini kepada maslahat *daruriyat*, *hajiyat* dan *tahsiniat*. Kesemua kemaslahatan ini merangkumi lima asas iaitu agama, akal, nyawa, keturunan dan harta. Maka Islam menurunkan peraturan kepada umat manusia bertujuan menjamin kemaslahatan kelima-lima asas tersebut. Oleh itu, dalam ilmu maqasid syariah, memelihara masyarakat tidak dapat ditegakkan melainkan dengan memelihara keturunan dalam institusi keluarga.

Dalam konteks kekeluargaan, Islam meletakkan memelihara keturunan sebahagian daripada matlamat perundangan Islam dalam memelihara kepentingan syarak. Maka institusi keluarga secara khusus berperanan untuk memelihara keturunan bagi menyempurnakan peranan manusia sebagai khalifah Allah SWT. Justeru Islam telah mensyariatkan perkahwinan dan hukum kekeluargaan sebagai wasilah dalam memastikan keturunan terpelihara. Memandangkan perkahwinan sebagai asas keluarga, maka Islam telah menyusun undang-undang syariatnya yang lengkap bertujuan menjaga keutuhan rumah tangga, memelihara suasana yang baik dan menyusun masyarakat. Islam juga telah menentukan hak dan kewajipan kepada setiap anggota keluarga iaitu suami, isteri dan anak-anak. Selain itu, Allah SWT telah menurunkan undang-undang kekeluargaan yang dipanggil munakahat untuk memastikan anggota keluarga tersebut menjalankan hak dan tanggungjawab masing-masing untuk mencapai kebahagiaan di dunia dan di akhirat (Ali Abd Halim 1991; Mustofa t. th).

PERNYATAAN MASALAH

Institusi keluarga merupakan struktur asas bagi keseluruhan sistem sosial dan kebudayaan dalam sesebuah masyarakat (Wan Nordin 2014). Pembentukannya bertujuan untuk meneruskan kesinambungan keturunan manusia bagi mengabdikan diri kepada Allah SWT dan sebagai khalifah di atas muka bumi. Namun pelbagai bentuk gejala negatif dan pengabaian keselamatan keluarga telah melanda masyarakat Islam terutamanya remaja Islam seperti masalah murtad, Syiah, Daesh, masalah keruntuhan akhlak, masalah disiplin murid, remaja lari dari rumah, pergaulan bebas, pembuangan bayi, melepak, penyalahgunaan dadah dan minum arak (Halimah 2015). Akhbar Sinar juga melaporkan jumlah penganut Syiah mencecah 1 juta orang sehingga Julai 2013. Manakala gejala murtad sudah sampai ke tahap kritikal dalam kalangan umat Islam di negara ini. Data berdasarkan rekod Mahkamah Syariah, seramai 863 kes telah dirujuk kepadanya antara tahun 2000 hingga 2010 bagi tujuan menukar status agama Islam. Pernyataan ini menunjukkan berlakunya pengabaian dalam memelihara institusi keluarga samada aspek akidah atau pun akhlak remaja masa kini.

METODOLOGI KAJIAN

Kajian ini berbentuk kajian kualitatif yang dipersembahkan secara deskriptif dengan menggunakan kaedah analisis kandungan. Untuk mendapatkan maklumat dan data kajian, pengkaji meneliti nas-nas al-Quran dan hadis berkenaan *maqasid syariah* dan institusi keluarga serta bahan-bahan primer seperti kitab-kitab asal berkenaan *maqasid syariah* dalam institusi kekeluargaan dan bahan sekunder seperti buku-buku, kertas kerja, jurnal dan laporan tesis. Dalam menerangkan analisis kandungan ini, pengkaji memfokuskan tulisan al-Syatibi, Ibn ‘Ashur dan al-Najjar sebagai dokumen utama untuk menganalisis kandungan perspektif *maqasid syariah* dalam institusi keluarga. Buku yang dijadikan rujukan adalah buku Nazariyyah al-Maqasid ‘Ind Imam al-Syatibi tulisan Ahmad Raisuni (2012), buku *maqasid al-syariah al-Islamiyah* tulisan Ibn ‘Ashur (1999) dan buku *maqasid al-Syariah Bi Ab’ad Jadidah* tulisan al-Najjar (2008). Selain itu, terdapat juga beberapa buah kitab terpilih lain yang digunakan berdasarkan keperluan untuk menyokong dapatan analisis. Sehubungan itu, pengkaji menggunakan metod induktif untuk menganalisa data-data yang dikumpulkan dan seterusnya menghuraikan sesuatu bahan atau maklumat bagi menguatkan sesuatu fakta supaya penulis dapat menghasilkan kesimpulan penting dan tepat.

HASIL KAJIAN

Perbincangan *maqasid syariah* dalam memelihara institusi keluarga berfokus kepada memelihara keturunan. Hasil kajian mendapati terdapat tiga perspektif penting dalam memahami *maqasid syarak* dalam memelihara *al-Nasl* (keturunan). Ibn ‘Ashur (1999) mendefinisikan *maqasid Syar’iah* sebagai maksud dan hikmah yang diambil kira oleh syarak dalam keseluruhan pensyariaan hukum atau sebahagian besarnya. Dalam hal ini, Ibn ‘Ashur (1999) meletakkan urusan muamalat dalam meletakkan *ahkam tasyriyat* kepada dua martabat iaitu *maqasid* dan *wasilah*. *Maqasid* adalah apa yang terkandung padanya kebaikan dan keburukan. Manakala *wasilah* ialah jalan untuk sampai kepada *maqasid*. Jalan yang mampu mencapai kebaikan berfungsi sebagai jalan yang paling baik atau sebaliknya.

Al-Nasl bermaksud penciptaan atau kelahiran. Kadang-kadang ia diertikan kepada anak kerana menunjukkan hasil daripada kelahiran. Bagi ilmu maqasid, memelihara *nasl* adalah salah satu daripada maqasid daruriyat yang lima. Secara lebih luas lagi, ia membawa maksud memelihara nasab, benih, melahirkan dan mendidik anak (al-Najjar 2008). Dalam hal ini, objektif syarak dalam sesuatu yang tertentu termasuk dalam maqasid khusus di mana setiap kelompok hukum tersebut mempunyai objektif atau tujuannya yang tersendiri yang menyokong maqasid ammah. Sehubungan itu, hukum hakam yang berkaitan isu keluarga dalam maqasid syariah berada pada maqasid khusus bagi menyempurnakan maqasid ammah iaitu *hifz nasl* dalam memelihara keluarga seperti objektif syarak pada wajib wali pada akad nikah. Ianya menjadi rukun kerana Islam menjaga hubungan dan ketanggungan seorang bapa terhadap anaknya ketika mana anaknya ingin berkahwin (Ibn ^cAshur 1999).

Tuntasnya, maqasid syariah dalam institusi keluarga ialah memastikan keturunan dalam sesebuah keluarga selamat daripada api neraka. Islam menuntut umatnya memelihara keluarga dalam merealisasikan tujuan penciptaan manusia. Seseorang muslim perlu memupuk dan memelihara iman serta takwa dalam diri mereka terlebih dahulu sebelum bertanggungjawab kepada keluarga sehingga terbentuknya masyarakat dan umat yang mengimani tanggungjawab mereka sebagai hamba dan khalifah Allah SWT. Institusi keluarga terpelihara apabila ahli keluarga melaksanakan segala perintah Allah SWT dan meninggalkan larangan serta menjadikan Islam sebagai satu cara hidup dalam kehidupan mereka (al-Najjar 2008).

Oleh itu, zuriat dan keturunan mestilah terpelihara nasabnya secara sah. Dalam hal ini, ibu bapa merupakan wasilah dalam memelihara keturunan bagi memastikan generasi umat manusia berupaya melaksanakan amanah Allah SWT sebagai khalifah di muka bumi. Justeru, pengkaji merumuskan bahawa memelihara institusi keluarga merupakan satu tuntutan dan kewajipan seorang muslim selepas mendidik dirinya dan menjadikan takwa sebagai asas dalam memelihara institusi keluarga. Memahami hakikat yang demikian, penulisan ini membentangkan analisis kandungan tiga perspektif maqasid syariah bagi memelihara keturunan dalam institusi keluarga.

i. Memelihara kesinambungan manusia

Sistem kekeluargaan dalam Islam adalah sebahagian daripada sistem ummah dalam sebuah kerajaan Islam. Kestabilan sebuah keluarga menjadi asas kepada kestabilan seluruh sistem kerajaan. Sehubungan itu, memelihara kesinambungan keturunan dalam sebuah keluarga secara umumnya bertujuan mencapai matlamat atau objektif syarak dalam pembentukan sistem ummah.

Memelihara kesinambungan keturunan bermaksud memastikan kewujudan generasi manusia secara berterusan dalam masyarakat dengan kelahiran yang cukup untuk menggantikan generasi yang lalu dengan bilangan yang telah hilang. Hal ini menjadikan masyarakat berkembang dengan jumlah tenaga muda untuk memastikan manusia dapat melaksanakan tugas mereka sebagai khalifah. Sekiranya kelahiran ini terputus, masyarakat akan hilang tenaga muda yang menyebabkan masyarakat menjadi lemah dan tua kerana bertambahnya nisbah kematian berbanding nisbah kelahiran. Ini menyebabkan masyarakat manusia tidak mampu melaksanakan tanggungjawab mereka sebagai khalifah Allah di muka

bumi ini. Maka memelihara kesinambungan generasi manusia atau kelahiran bermaksud memelihara keturunan dan membina masyarakat dari perspektif maqasid syariah.

Pernyataan ini dijelaskan dalam ungkapan Ibn ʿAshur (1999): “Sistem kekeluargaan yang tersusun adalah asas ketamadunan ummah dan kesatuannya. Oleh itu, bertindak menyusun sistem kekeluargaan yang teratur menjadi fokus seluruh sistem perundangan manusia.

Ibn ʿAshur (1999) berpandangan bahawa penyusunan sistem kekeluargaan amat penting dalam membentuk ummah kerana melalui sistem ini dapat memelihara kesinambungan generasi atau keturunan supaya tugas khalifah yang ditaklifkan kepada manusia dapat diwarisi.

Al-Najjar (2008) juga menjelaskan melalui ungkapannya: “Bukanlah masyarakat itu melainkan terdiri dari individu-individu yang lahir daripada sekumpulan manusia yang mempunyai hubungan antara satu sama lain. Oleh sebab itu, Syariat Islam mengambil berat memelihara masyarakat dengan memelihara keturunan dan menjadikan memelihara keturunan sebagai objektif syarak dalam memelihara masyarakat. Masyarakat yang soleh dapat membangunkan manusia untuk menunaikan tanggungjawab yang telah disyariatkan. Keluarga adalah wasilah atau tapak dasar untuk membangunkan masyarakat yang soleh. Masyarakat yang soleh terdiri dari himpunan keluarga yang soleh. Sekiranya keluarga itu kukuh maka kukuhlah masyarakat dan begitulah sebaliknya”.

Ungkapan ini menggambarkan bahawa syariat Islam mengambil berat dalam menyusun satu sistem kehidupan manusia untuk menyempurnakan objektif asal penciptaan manusia sebagai hamba dan khalifah Allah SWT. Penyusunan sistem kehidupan manusia bertujuan mendidik individu-individu dalam sesebuah keluarga, masyarakat seterusnya ummah untuk kelangsungan atau kesinambungan generasi manusia.

Memelihara kesinambungan generasi merupakan suatu perkara wajib memandangkan amanah sebagai khalifah Allah swt tidak dapat dilaksanakan melainkan dengan kewujudan generasi secara berterusan. Ini dapat dilihat dengan pernyataan al- Najjar (2008): “Masyarakat tidak dapat dibentuk melainkan dengan kelahiran yang berterusan. Sekiranya kelahiran terhenti maka lemah dan hilang kekuatan sesebuah masyarakat.”

Pernyataan ini menunjukkan bahawa pembentukan masyarakat tidak mungkin berterusan kecuali melalui dengan penerusan kelahiran dan ia merupakan asas dalam menunaikan amanah Allah SWT sebagai khalifah di muka bumi. Terhentinya proses kelahiran merupakan satu dosa besar dari aspek maqasid.

Sehubungan itu, Islam menggalakkan mereka yang berkemampuan supaya berkahwin kerana perkahwinan merupakan salah satu daripada sunnah para nabi-nabi terdahulu yang merupakan seorang manusia yang patut dicontohi (al-Yubi t.th). Pernyataan al-Najjar (2008): “Apabila datangnya perintah kelahiran, maka Islam telah mensyariatkan perkahwinan kerana ia satu-satunya jalan melahirkan keturunan yang sah seperti mana sabda rasulullah SAW dalam hadis “wahai pemuda, sesiapa dalam kalangan kamu yang mampu maka berkahwinlah kamu”. Syarak juga meletakkan asas matlamat perkahwinan adalah melahirkan anak yang ramai”.

Pernyataan ini menerangkan bahawa Islam mensyariatkan perkahwinan dalam memastikan kelahiran yang berlaku selari dengan kehendak syarak. Dalam hal ini juga, Islam menggalakkan memilih calon wanita yang subur dan mampu melahirkan anak yang ramai bertujuan meramaikan generasi untuk memelihara agama Allah SWT.

Dapatan ini dapat dilihat pada tulisan Ibn ʿAshur (1999) iaitu: “Sehingga kini syariat Islam mengambil berat menyusun asas sistem pembentukan keluarga melalui akad pernikahan

yang menyatukan lelaki dan wanita yang dinamakan nikah. Pernikahan adalah asas pembentukan zuriat, menghubungkan kaum kerabat asas dan cabangnya”.

Pernyataan ini menjelaskan bahawa keluarga merupakan tunjang kepada pembentukan masyarakat dan negara bagi kesinambungan generasi umat manusia. Maka Islam telah menetapkan sistem dan peraturan dalam institusi keluarga bagi memastikan pembentukan umat sejajar dengan perintah Allah SWT. Sehubungan itu, Islam telah mensyariatkan perkahwinan yang menepati syarak sebagai komponen paling asas dalam proses memelihara keturunan dalam pembentukan keluarga, masyarakat dan negara keseluruhannya.

Syariah Islam juga melarang sebarang jalan yang membantut proses kelahiran seperti tabattul iaitu tidak ingin berkahwin, azzal, membuang rahim, menggugurkan anak dan sebagainya. Al-Najjar (2008) telah menyatakan dalam bukunya iaitu: “Dan apa yang boleh disokong dengan apa yang datang dari syarak iaitu menolak setiap halangan yang boleh menghalang dari berlakunya kelahiran. Asasnya Islam melarang untuk tidak berkahwin dan menghalang kelahiran seperti azzal, membuang rahim dan sebagainya. Islam juga melarang persetubuhan yang tidak menghasilkan zuriat seperti liwat. Perbuatan sedemikian hanya dapat menghilangkan syahwat tetapi tidak boleh menghasilkan zuriat atau keturunan.”

Pernyataan ini menerangkan Islam melarang at-tabattul dan al-khasa. Rasulullah SAW bersabda, yang bermaksud: “Daripada Sa’ad bin Abi Waqqas berkata, Rasulullah SAW menolak Uthman Ibn Maz’un untuk membujang. Andaikata dia dibenarkan membujang tentu kami (para sahabat) akan membujang sahaja”.

Hakikat ini diperkukuh lagi oleh *al-Tabari* dengan menyatakan bahawa at-tabattul yang dimaksudkan oleh Uthman Ibn Maz’un itu ialah mengharamkan dirinya untuk mengahwini wanita dan menikmati segala macam kenikmatan hidup kerana ia dianggap mengharamkan apa yang dihalalkan oleh Allah SWT. Sehubungan itu Allah SWT berfirman dalam surah al-Maidah (5:87), yang bermaksud: “Wahai orang-orang Yang beriman! janganlah kamu haramkan benda-benda Yang baik-baik Yang telah Dihalalkan oleh Allah bagi kamu, dan janganlah kamu melampaui batas (pada apa Yang telah ditetapkan halalanya itu); kerana Sesungguhnya Allah tidak suka kepada orang-orang Yang melampaui batas”.

Pengembangan ummah juga berlaku melalui persemendaan yang terbina melalui hubungan keturunan dan pernikahan. Sebagaimana firman Allah SWT dalam surah al-Furqan (25:54) yang bermaksud: “Lalu dijadikan kamu berketurunan dan bersemenda”.

Pernyataan ini dapat dilihat pada tulisan Ibn ‘Ashur (1999) iaitu: “Daripada sistem pernikahan terbentuklah tanggungjawab keibuan, kebapaan dan anak-anak. Daripada sini lahir pula hubungan persaudaraan atau kurang daripada itu lahir hubungan kaum. Gabungan hubungan pernikahan dengan hubungan keturunan dan kaum berlakulah hubungan persemendaan. Maka Syariat Islam datang menyusun sistem perhubungan semuanya ini dan hubungan berasaskan syariat Islam ini adalah hubungan yang adil, kukuh dan mulia.”

Pernyataan ini menerangkan bahawa sistem ummah berjaya ditegakkan dengan memelihara generasi secara berterusan melalui sistem perkahwinan dan berkembang melalui hubungan kekeluargaan dan persemendaan. Perkahwinan yang sah dan berkualiti membentuk sistem ummah yang berkualiti.

Kesimpulannya memelihara kesinambungan generasi merupakan objektif syarak dalam memelihara institusi keluarga dan asas dalam memelihara keturunan bagi melaksanakan amanah Allah sebagai khalifah di muka bumi. Justeru, institusi keluarga berperanan dalam

memastikan kewujudan umat yang melaksanakan ketaatan serta kepatuhan kepada Allah SWT sebagai hamba dan khalifah di muka bumi.

ii. Memelihara kestabilan keluarga

Masalah umum syariah bertujuan memelihara daruriyat al-khams iaitu memelihara agama, akal, nyawa, keturunan dan harta. Menurut Nurudin al-Khadimi (2001) *hifz nasab* ialah memelihara nasab melalui perkahwinan yang disyariatkan serta memastikan anak yang lahir dinasabkan kepada bapanya bagi memelihara kestabilan keluarga dan tidak seperti keturunan haiwan yang tidak mengenali keturunannya. Dapatan ini dijelaskan dengan pandangan Ibn ʿAshur (1999):

“Ikatan kaum kerabat bermula dengan anak-anak dan ibu bapa. Melalui hubungan lelaki dan perempuan lahirlah keturunan. Keturunan yang sah di sisi syarak adalah keturunan yang lahir daripada akad pernikahan yang sah. Perkahwinan yang sah menyelamatkan keturunan daripada keraguan. Hakikatnya dengan mengkhususkan seorang wanita kepada seorang lelaki adalah untuk kemantapan keturunan supaya wujud keyakinan bahawa pengkhususan itu sabitlah keturunan kepada bapanya. Pengkhususan ini telah menghalang wanita daripada digauli oleh ramai lelaki yang menyebabkan kekeliruan dalam keturunan”.

Pernyataan ini menjelaskan bahawa Islam mensyariatkan perkahwinan bukan sahaja untuk memenuhi keperluan *jinsiah* manusia, tetapi bagi memastikan zuriat yang lahir adalah dari nasab bapanya yang sebenar untuk membuktikan kesahihan keturunan tersebut. Dalam hal ini, apabila keturunan atau zuriat yang lahir dapat dinasabkan kepada ayahnya yang sebenar, maka kestabilan keluarga akan terpelihara. Dapatan ini selari dengan tulisan al-Najjar (2008):

“Sesungguhnya menurut ahli psikologi, kejahilan nasab menyebabkan jiwa dan emosi seorang anak terganggu sehingga terkesan dalam hubungan masyarakat. Maka syariat mengambil berat dalam memelihara nasab kerana ia akan membentuk emosi yang tenang dalam melaksanakan kehidupannya”.

Pernyataan ini menjelaskan bahawa zuriat yang lahir dari perkahwinan yang sah akan melahirkan perasaan kasih sayang dan nilai tolong menolong pada suami isteri yang membuahkan rasa tanggungjawab untuk mendidik anak-anak selari dengan tuntutan Islam.

Nasab atau keturunan wajib dipelihara demi menjaga sistem sosial dalam masyarakat Islam. Hal ini kerana, apabila keturunan telah rosak akibat daripada menyalahi syariat dan tabiat semula jadi manusia, ia akan menyebabkan berlakunya kacau bilau pada struktur institusi keluarga dan seterusnya menyebabkan keruntuhan sosial masyarakat Islam. Sehubungan itu, Islam telah menggariskan beberapa perkara bagi memelihara keturunan, antaranya ialah melalui perkahwinan, tanggungjawab kekeluargaan serta batasan pergaulan bagi perhubungan berlainan jenis. Seterusnya, bagi mencegah berlakunya kerosakan terhadap keperluan asas ini, maka Islam juga telah melarang dan menetapkan hukuman yang keras bagi kesalahan seperti

perzinaan, jenayah rogol dan sebagainya. Dapatan ini dijelaskan dengan pandangan Ibn ‘Ashur (1999) iaitu:

“Pernikahan sebelum Islam mengiktiraf keturunan daripada pernikahan yang diterima waktu itu sama ada melalui pelacuran, istibdha’ dan sebagainya. Apabila datangnya Islam, pernikahan tersebut dibatalkan kerana memberi kemudahan kepada manusia dan tidak mempunyai nasab serta keturunan yang sah. Maka Islam menjadikan pernikahan sebagai tumpuan tertinggi syariat kerana pernikahan adalah asas kepada sistem kekeluargaan. Islam hanya menerima satu cara pernikahan yang sah iaitu seorang lelaki meminang seorang wanita daripadanya walinya atau bapanya lalu membayar maharnya dan menikahinya”.

Pernyataan ini menerangkan bahawa Islam mensyariatkan perkahwinan sebagai satu jalan untuk memastikan zuriat yang lahir adalah jelas keturunannya. Islam juga menjelaskan betapa bahayanya gejala perhubungan perkahwinan iaitu zina yang menyebabkan timbulnya kekusutan dan kesamaran dalam menisbahkan anak kepada bapanya.

Sehubungan itu juga, Islam mensyariatkan untuk mengiklankan perkahwinan kerana ia antara objektif asas dalam menyabitkan nasab atau keturunan. Dapatan ini dijelaskan dalam tulisan al-Najjar (2008): “Mengiklankan perkahwinan bertujuan untuk tidak menimbulkan keraguan kepada anak yang dilahirkan”.

Pernyataan ini menjelaskan bahawa hukum mengisytiharkan perkahwinan bertujuan perkahwinan seseorang itu dapat diketahui umum dan zuriat yang lahir tidak diragui oleh masyarakat sekeliling.

Dalam hal ini, Islam juga menetapkan iddah dalam memastikan rahim seseorang wanita yang berpisah dengan suaminya bersih dan selamat daripada benih bekas suaminya. Pandangan al-Najjar (2008) dalam tulisannya ialah:

“Dan begitu juga dalam hukum iddah iaitu pensyariatan iddah dalam hukum kekeluargaan bertujuan diketahui status rahim dalam tempoh perceraian. Ia bermaksud supaya rahim seorang wanita yang bercerai, kosong dan suci dari benih bekas suami terdahulu. Bertujuan tiada keraguan kiranya wanita tersebut berkahwin lagi dan melahirkan anak”.

Pernyataan ini menjelaskan bahawa sekiranya tiada hukum iddah dalam tempoh perceraian, berkemungkinan akan berlaku percampuran benih antara bekas suami dan suami yang kedua. Ini boleh menyebabkan kekeliruan dalam menentukan nasab anak yang lahir.

Tuntasnya keturunan yang lahir daripada perkahwinan yang sah dan bernasabkan kepada bapanya yang sah melahirkan keluarga yang stabil dalam konteks maqasid untuk memelihara keturunan. Anak yang lahir daripada perzinaan dikenali sebagai anak tidak sah taraf akan kehilangan hak mereka sebagai seorang anak iaitu pusaka, hadonah, nasab dan sebagainya. Kesemua ini akan melonggarkan rasa kasih sayang dan tanggungjawab terhadap keturunan mereka. Justeru hanya ibu bapa yang sah nasabnya sahaja mampu melahirkan kestabilan keluarga dari aspek psikologi.

iii. Memelihara kualiti kesolehan keturunan

Islam meletakkan anak sebagai amanah Allah SWT yang wajib dijaga dan dididik dengan baik. Tanggungjawab ibu bapa amat besar dan seharusnya dilaksanakan dengan sebaiknya untuk menyelamatkan mereka ahli keluarga daripada ancaman api neraka (al-Ghazali 1992 dan Wan Nordin et al 2014). Keselamatan keturunan bangsa, budaya manusia dan juga kesinambungan fungsi khalifah bergantung kepada keberkesanan gerakan proses pembiakan dan kelahiran manusia (Rosnaaini Hamid et al. t.th). Dalam hal ini, keluarga ialah institusi yang dapat memikul tanggungjawab bagi keseluruhan proses tersebut daripada fasa permulaan sehingga ke peringkat perkembangannya.

Sehubungan itu, membina ummah melalui pembentukan manusia merupakan tuntutan agama. Pandangan ini dapat dirumuskan melalui maksud ayat Allah SWT dalam surah al-Tahrim (66:6) yang bermaksud: “Wahai orang-orang yang beriman! Peliharalah diri kamu dan keluarga kamu dari neraka yang bahan-bahan bakarannya: Manusia dan batu (berhala); Neraka itu dijaga dan dikawal oleh malaikat-malaikat yang keras kasar (layanannya); mereka tidak menderhaka kepada Allah dalam segala yang diperintahkanNya kepada mereka, dan mereka pula tetap melakukan segala yang diperintahkan”.

Dalam hal ini, kesejahteraan masyarakat dan ummah tidak akan terbina tanpa pembinaan insan yang cemerlang. Sehubungan itu, syariat meletakkan tanggungjawab membina insan sebagai maqasid tertinggi dalam memelihara keturunan. Pernyataan ini dapat dilihat dari tulisan Ibn ‘Ashur (1999) iaitu:

“Syariat meletakkan tanggungjawab membina insan sebagai maqasid tertinggi dalam memelihara keturunan. Kesejahteraan masyarakat dan ummah tidak akan terbina tanpa pembinaan insan yang cemerlang. Tanpa perkahwinan yang sah dan pendidikan anak-anak yang bertepatan syarak, maqasid pembentukan institusi keluarga bagi melahirkan rijal sebagai hamba Allah SWT dan menjadi khalifah serta menjaga agama di muka bumi ini tidak mungkin dapat ditegakkan”.

Pernyataan ini menerangkan bahawa membina insan merupakan maqasid dalam pembentukan keluarga dan masyarakat. Pembentukan masyarakat soleh dapat memudahkan manusia melaksanakan tugas sebagai khalifah Allah SWT. Allah SWT mencipta manusia sebagai seorang hamba dan khalifah di muka bumi ini berdasarkan surah al-Dzariyat (26:56) yang bermaksud: “Tidaklah aku ciptakan manusia melainkan untuk beribadah kepada Allah SWT”. Memelihara kualiti kesolehan generasi berpunca dari keberkesanan dalam mendidik insan. Hal ini dapat dirumuskan dari pandangan ulamak Ibn ‘Ashur (1999).

“Sesungguhnya maqasid umum dari perundangan terdapat padanya iaitu memelihara sistem ummah dan berterusan pembaikannya dengan orang yang mengendalikannya iaitu insan. Pembaikan insan ini mestilah menyeluruh bukan sahaja kepada akal dan amalnya tetapi apa yang berada dalam kehidupannya. Sehubungan itu kita melihat Islam membaiki kebaikan manusia dengan membaiki diri manusia dan mereka yang berada bersamanya.

Pernyataan ini menjelaskan bahawa sistem ummah akan terus terpelihara sekiranya berterusan kewujudan manusia berkualiti dalam melaksanakan amanah sebagai khalifah Allah SWT bagi memelihara sistem ummah.

Dalam hal ini juga, al-Najjar (2008) berpandangan bahawa kualiti insan ialah: “Memelihara keturunan juga bermaksud mendidik anak-anak aspek keluarga secara khusus dan masyarakat secara umum. Pendidikan ini bermula sebelum kelahiran sehinggalah mereka baligh meliputi keperluan material untuk pembesaran sempurna, pendidikan jiwa, akhlak dan pemikiran minda sehingga membentuk individu soleh dan musleh. Pendidikan menyeluruh ini penting untuk memudahkan manusia untuk melaksanakan amanah sebagai khalifah Allah SWT”.

Pandangan ini menjelaskan bahawa kualiti kesolehan anak merangkumi semua aspek kehidupan manusia sangat penting dalam membantu manusia melaksanakan tugas sebagai hamba Allah SWT dan khalifah di muka bumi dalam menyempurnakan sistem ummah. Allah SWT juga menurunkan syariat kepada manusia bertujuan memelihara kemaslahatan manusia bukan dengan sia-sia. Berkeluarga bertujuan memelihara kesinambungan keturunan manusia. Institusi keluarga pula merupakan unit sosial dalam masyarakat dan bertindak sebagai penyumbang utama kepada proses pembangunan insan. Justeru manusia berkewajipan memelihara kualiti kesolehan generasi dalam membina sistem ummah untuk mencapai objektif syarak sebagai khalifah Allah SWT.

Dalam konteks mendidik keturunan, Abdullah Nasih Ulwan (1989) berpandangan bahawa pendidikan akidah merupakan asas dalam pembinaan peribadi anak-anak. Sementara itu, al-Syatibi (2004) menegaskan bahawa matlamat ditegakkan kehidupan manusia itu sendiri adalah untuk memelihara agama, nyawa, akal, keturunan dan harta benda. Syariat ini kemudiannya dikenali sebagai *daruriyat al-khams* yang membawa maksud lima kemaslahatan dasar yang menjadi asas tegaknya kehidupan manusia. Lima perkara tersebut dijadikan keperluan asas di mana manusia tidak mampu hidup sempurna tanpa lima perkara tersebut. Kehidupan manusia akan menjadi rosak sama ada di dunia atau di akhirat jika kepentingan asas ini tidak ada atau tidak dipenuhi. Hal ini dapat dirumuskan dari pandangan ulamak Ibn ‘Ashur (1999):

“Pembaikan insan ini mestilah menyeluruh bukan sahaja kepada akal dan amalnya tetapi apa yang berada dalam kehidupannya. Pembentukan aqidah merupakan asas dalam pembentukan manusia seterusnya ibadat dan apa yang menyentuh kehidupan manusia”.

Melalui pernyataan ini menunjukkan didikan akidah adalah asas dalam pembentukan kualiti seorang anak. Dalam hal ini juga, jelas wujudnya hubungan maqasid memelihara keturunan dalam institusi keluarga dengan pembinaan insan dan ummah yang cemerlang. Memelihara keturunan bermaksud mendidik anak dalam keluarga secara khusus dan mendidik masyarakat secara umum. Pendidikan anak bermula dari rahim dan berterusan hingga membesar sebagai seorang Muslim yang menjaga agamanya. Dapatan ini juga dinyatakan pada

tulisan an-Najjar (2008): “Berdasarkan ilmu maqasid, memelihara dharuriyat al-khams pada pendidikan anak-anak sebahagian daripada konsep memelihara keturunan.”.

Pernyataan ini menunjukkan bahawa pendidikan anak-anak merupakan suatu perkara asas dalam memastikan keturunan yang lahir menepati maqasid syariah untuk memelihara institusi keluarga, masyarakat dan sistem ummah.

Dalam hal ini, perkahwinan dan pendidikan anak-anak berkait rapat dalam menyempurnakan maqasid syariah dalam sistem institusi keluarga. Justeru itu, ibu bapa perlu berperanan dan bertanggungjawab dalam mendidik anak-anak agar kesinambungan generasi rabbani berterusan wujud di muka bumi ini bagi mencapai kebahagiaan abadi di dunia dan di akhirat. Bagi menjalankan peranan tersebut dengan baik, ibu bapa seharusnya memiliki keperibadian dan personaliti yang unggul serta memahami tanggungjawab sebagai seorang ibu bapa (Adawiyah et al. 2015). Hal ini dapat dilihat pada tulisan Ibn ‘Ashur (1999) iaitu: “Ibu bapa merupakan wasilah dalam menyempurnakan maqasid syariah dalam memelihara institusi keluarga yang seharusnya memainkan peranan bersama-sama dalam mencorakkan hala tuju keluarga sejajar dengan maqasid syariah iaitu jalbu masalih wa dar u mafasid”.

Pernyataan ini menjelaskan bahawa ibu bapa merupakan agen yang bertanggungjawab dan menjadi qudwah adalah penting dalam mendidik anak-anak. Dalam pada itu, menurut Hasnan (2009), memiliki personaliti yang baik adalah tuntutan akidah berasaskan keyakinan kepada Tuhan dan pertimbangan hisab yang dijalankan di akhirat nanti. Oleh kerana memiliki personaliti Islam adalah satu kewajipan individu, maka berusaha membentuk personaliti ini adalah satu kewajipan. Justeru ibu bapa perlu berusaha membentuk personaliti yang baik bagi sebagai qudwah dalam mendidik anak-anak.

Justeru, dalam konteks matlamat atau tujuan pembentukan institusi keluarga, mendidik kualiti anak merupakan salah satu tuntutan agama. Tuntasnya, ibu bapa bertanggungjawab dan berkewajipan dalam memastikan keturunan dan zuriat mereka dididik dengan tarbiyah Islam merangkumi kelima-lima pemeliharaan supaya mereka dapat memikul amanah Allah SWT sebagai hamba Allah SWT dan khalifah di muka bumi ini sebagaimana objektif syarak dalam penciptaan manusia. Secara kesimpulannya, pemeliharaan sistem ummah ini memerlukan kepada orang yang mengendalikannya. Sehubungan itu, pembinaan insan bagi mewarisi sistem ini merupakan satu kewajipan dan ianya bermula dari sesebuah keluarga.

KESIMPULAN

Pemeliharaan institusi keluarga secara umumnya bertujuan memelihara sistem ummah sebagai khalifah yang memakmurkan muka bumi Allah SWT. Hal ini kerana sistem ummah lahir daripada kekuatan keluarga dan masyarakat. Sehubungan itu, ibu bapa berperanan dalam menyediakan generasi dalam menyempurnakan tugas khalifah ini. Maka secara asasnya memelihara institusi keluarga adalah membawa maksud memelihara keturunan yang akan mewarisi tugas manusia sebagai khalifah Allah SWT. Justeru, tiga perspektif maqasid dalam pembentukan institusi keluarga melalui sistem perkahwinan bertujuan meneruskan kesinambungan generasi, kestabilan keluarga dan kualiti kesolehan anak yang dilahirkan. Berasaskan perkara ini, kefahaman terhadap ketiga-tiga maqasid tersebut penting dalam memastikan institusi keluarga yang terdiri daripada individu-individu manusia mampu menjalankan tugas mereka sebagai khalifah di muka bumi.

RUJUKAN

- Abdullah Nasih Ulwan.1988. *Pendidikan Anak-anak Dalam Islam (terj.)*. Pustaka Nasional Singapura.
- Abdullah Sulong & Siti Nurfairuz. t.th. *Faktor-faktor yang Mempunyai Hubungan dengan Pembentukan Keluarga Bahagia: Kajian di Kalangan Pelajar Tahun 4 Fakulti Pendidikan, UTM*. Fakulti Pendidikan, UTM.
- Abdul Halim Mahmud.1991. *Tarbiyah al-Nasyi al-Islami*. Kaherah: Dar al-Qalam.
- Abd. Jalil Mohd Hassan. 1993. *Perkahwinan Dalam Islam (Berdasarkan Dalil, Hukum, Hikmat Dan Panduan Kebahagiaan)*. Kuala Lumpur: A.S. Noordeen.
- A'dawiyah Ismail.2011. *Pembentukan Keluarga Berkualiti dalam kalangan Wanita Bekerjaya Menurut Islam: Kajian Kes Di Putrajaya*. Penerbitan: UKM, Bangi, Selangor.
- Ahmad Sunawari Long.2014. *Metodologi Penyelidikan Pengajian Islam*. Penerbitan UKM, Bangi, Selangor.
- Ahmad Hasan Karzun. 1997. *Mazaya Nizam al-Usrah fi al-Islam*. Beirut: Dar Ibn Hazm.
- Ibn ʿĀshūr, Muḥammad Ṭāhir. 2001. *Maqāṣid Al-Sharīʿah Al-Islāmiyyah*. Muḥammad al-Ṭāhir Al-Maysāwī (pnyt.). Ed. ke-2. Amman: Dār al-Nafā'is.
- Al-Ghazālī. 1992. *Menyingkap Hakikat Perkahwinan*. Terj. Muhammad al-Baqir. Cetakan keempat. Bandung Penerbit Karisma.
- Al-Kilani, Abd. Rahman Ibrahim, 2000. *Qawaid al-maqasid inda al-Imam al-Syatibi*. Damsyik, Dar al-Fikr.
- Al-Najjār, ʿAbd al-Majīd. 2008. *Maqāṣid Al-Sharīʿah Bi Abʿād Jadīdah*.
- Al-Raysūnī, Aḥmad. 1995. *Nazariyyah Al-Maqāṣid ʿInda Al-Imām Al-Syāṭibī*. London New York. The International Institute of Islamic Thought.
- Al-Shāṭibī, Ibrāhīm Ibn Mūsā al-Lakhmy. 2004. *Al-Muwāfaqāt Fī Uṣūl Al-Sharīʿah*. Beirut: Dār al-Kutub al-ʿIlmiyyah.
- Al-Tabari, Abi Jaafar Muhammad Ibn Jarir, 1999. *Tafsir al-Tabari*. Beirut: Dar al-Kutub al-ʿIlmiyyah.
- Jawiah Dakir. 1996. Asas Pembentukan Keluarga Menurut Perspektif al-Quran dan al-Sunnah, *Islamiyyat* 17 (1996) 3-18
- Kamus Dewan*. 2010. Kuala Lumpur: Dewan Bahasa dan Pustaka.
- Ibn Manzur. 1990. *Lisan al-Arab*. Beirut: Dar al Fikr.
- al-Jauhari Mahmud Muhammad. 2000. *Al-akhawat al-Muslimat*. Mesir: Dar al-Tauzi' wa al-Nasyr al-Islamiyyah.
- al-Firuzi al-Abadi Muhammad bin Yaakub. 1971. *al-Qamus al-Muhit*, Beirut: Muassasah Risalah.
- al-Faqih Muhammad Jawad. 1993. *Al-Usrah al-Muslimah*. Beirut: Dar al-Adhwa'.
- Ratna Roshida Abd. Razak.2007, Peranan Institusi Keluarga Dalam membina tamadun manusia. *Jurnal Kemanusiaan* bil 9 Jun 2007.
- Siti Shamsiah. 2017. *Muzakarah Pakar (Pengukuhan Institusi Kekeluargaan Berlandaskan Maqasid al-Syariah)*. Institut Kefahaman Islam Malaysia.
- Su'ad Ibrahim Saleh. 1982. *Adhwa' ʿala Nizam al-Usrah Fi al-Islam*. Jeddah: Penerbitan Tihama.

- al-Qardhāwī Yusuf.1996. *Madkhal li Maʿrifat al-Islam Muqawwimah Khasais Ahdafuh Masadiru*. Kaherah: Maktabah Wahbah.
- al-Zuhaili Wahbah.1991. *Tafsir al-Munir*. Jilid 13. Lubnan: Dar al-Fikr al-Muʿasir.
- Wan Nordin Wan Abdullah et al.2014. *Tafsir Maudhuʿiy: kekeluargaan*. Dewan Bahasa & Pustaka